



KEMENTERIAN PERPADUAN NEGARA

TEKS UCAPAN

**YB DATUK AARON AGO DAGANG
MENTERI PERPADUAN NEGARA**

**PROGRAM JEJAK HARMONI SEMPENA SAMBUTAN
MINGGU KEHARMONIAN ANTARA PENGANUT AGAMA
SEDUNIA (WIHW) TAHUN 2025**

**15 FEBRUARI 2025 (SABTU)
8.30 PAGI - 2.00 PETANG
DAERAH SENTUL, W.P KUALA LUMPUR**

Salam Perpaduan dan Salam Malaysia MADANI.

Terima kasih saudara Pengacara Majlis.

SALUTASI

**Salutasi terkini disediakan secara berasingan*

PENDAHULUAN

1. Pada pagi ini, kita diberi peluang untuk berkumpul bersama-sama dalam **Program Jejak Harmoni Sempena Minggu Keharmonian Antara Penganut Agama Sedunia (WIHW) Tahun 2025**. Program ini merupakan anjuran **Majlis Perundingan Malaysia bagi Buddha, Kristian, Hindu, Sikh dan Taoisme (MCCBCHST)** dengan kerjasama **Kementerian Perpaduan Negara**.
2. Pada tahun 2024, Kementerian Perpaduan Negara telah melancarkan **Inisiatif Harmoni MADANI** bagi meningkatkan kefahaman rakyat Malaysia mengenai kepelbagaian agama, budaya dan adat resam di negara ini.
3. Pelaksanaan Program Jejak Harmoni ini juga merupakan sebahagian daripada usaha di bawah Inisiatif Harmoni MADANI. Jejak Harmoni ini bukan sekadar sebuah pergerakan fizikal dari satu tempat ke tempat lain, tetapi ia

adalah **satu perjalanan simbolik yang menggambarkan semangat kesatuan dan kebersamaan rakyat Malaysia.**

4. Pada hari ini, saya dimaklumkan kita akan berjalan kaki **dari Masjid Al-Hidayah, Sentul Pasar, dan berakhir di Gurdwara Sahib, Sentul.**
5. Saya juga ingin mengambil kesempatan ini untuk meningkatkan semua pihak untuk **tidak sensasikan atau politikkan program ini, hal ini kerana program ini tidak melibatkan sebarang aktiviti keagamaan.** Saya juga ingin menekankan bahawa program ini bertujuan untuk meningkatkan kefahaman masyarakat terhadap pelbagai anutan agama dan budaya yang perlu dihormati dan diterima.
6. Melalui program ini, masyarakat didorong untuk melihat dari sudut yang baik, dengan **menekankan konsep asas integrasi nasional iaitu faham, hormat, dan terima,** bagi memastikan budaya keharmonian antara masyarakat sentiasa terpelihara.
7. Dengan memahami, kita dapat menghapuskan prasangka negatif. Dengan menghormati kepercayaan orang lain, kita dapat mewujudkan hubungan yang harmoni. Dan dengan menerima perbezaan, kita dapat hidup bersama dalam satu masyarakat yang bersatu padu.

KEPELBAGAIAN MALAYSIA

Hadirin yang saya hormati sekalian,

8. Sebagai sebuah negara yang kaya dengan kepelbagaian, kita tidak boleh menafikan bahawa perbezaan wujud dalam pelbagai aspek kehidupan. Namun, kita harus melihat perbezaan ini sebagai kekuatan dan bukannya kelemahan. **Kepelbagaian ini tidak seharusnya menjadi jurang pemisah, sebaliknya menjadi asas kepada satu masyarakat yang inklusif dan saling menghormati.**
9. **Kerajaan sentiasa komited dalam memastikan perpaduan rakyat terus diperkukuhkan menerusi pelbagai inisiatif dan dasar yang menggalakkan interaksi, keharmonian serta kesejahteraan bersama.** Saya percaya bahawa dengan saling memahami dan menghormati antara satu sama lain, kita mampu menjadikan Malaysia sebuah negara yang lebih maju dan makmur.
10. Saya turut mengingatkan semua pihak supaya **berhati-hati dalam menyampaikan pandangan mengenai isu agama.** Kebebasan bersuara bukan alasan untuk menghina atau merendahkan kepercayaan orang lain. Sebaliknya, saya menyeru agar rakyat menggunakan kebebasan ini untuk membina keharmonian dan perpaduan yang lebih kukuh.

11. Media sosial menjadi platform utama dalam menyebarkan maklumat, dan penggunaannya haruslah dengan penuh tanggungjawab. **Perbuatan menyebarkan berita palsu atau kenyataan provokatif mengenai agama boleh memburukkan keadaan dan mengundang ketegangan antara masyarakat.** Oleh itu, saya menyeru rakyat untuk mengamalkan sikap matang dalam setiap perbincangan berkaitan agama dan kaum.

PENUTUP

Hadirin yang saya hormati sekalian,

12. Suka saya **menyeru kepada semua pihak khususnya badan-badan pertubuhan agama untuk turut mengambil bahagian dalam melaksanakan aktiviti - aktiviti berunsurkan keharmonian** dengan menyebarkan mesej keharmonian dan nilai-nilai murni bagi menyokong kepada pencapaian matlamat Inisiatif Harmoni MADANI ini.
13. Kerajaan melalui Kementerian Perpaduan Negara sentiasa menyambut baik usaha-usaha dan peranan yang dimainkan oleh pertubuhan dan badan-badan agama bagi membantu **membina tapak integrasi nasional yang lebih kukuh** melalui program-program yang telah dilaksanakan di peringkat akar umbi.

14. Dengan itu, saya merasmikan Program Jejak Harmoni sempena Sambutan Minggu Keharmonian Antara Penganut Agama Sedunia.

Terima Kasih.